

JISŌS YOKWE AJRI IM EAR KATAKIN JUON IROOJ E MWEIIE

Köttōpar ko an katak in:

- Kwaļok meļeļein itok ñan Jisōs āinwōt juon ajri.
- Kwaļok aorōken tōmak im jab lōke tokjān jermal ko ad.
- Kwaļok bwe jej aolep likjab jān kien ko an Anij.
- Kwaļok aorōken lōke Jisōs.

Meļeļe ko reļap ilo katak in:

- Jen lo bwe Jisōs ej yokwe aolep armej, meñe rej ri jerōwiwi.
- Jen lo bwe ajri im rūtto, ri jeraṃōl im ri ṃweiiie rej aikuj lōṃṃor.
- Jen lo bwe jen tōmak Jisōs wōt im jab lōke ad kōjparok kien.
- Jen lo bwe kajoor ñan lōṃṃor ej pād ippān Anij wōt.

Jermal eo eļap an Jisōs ej bwe en pinmuur ñan kōj. Ear mej bwe jen mour. Ear katoṃrļok bōtōktōken bwe jen erre jān jerōwiwi ko ad im wānōk iṃaan mejān Anij. Eṃōj ad katak bwe Jisōs ej iaļ eo wōt ñan Anij. Jisōs ej kōjām in sheep. Ej jerkakpeje im mour eo. Eļaññe ej ṃool men in, innām jen lōke wōt Jisōs. Eļaññe Jisōs Kraist ej iaļ eo wōt ñan Anij, innām eļap an aorōk kadkadin im wāween ad lōke E. Juon kabuñ ej ba lōke im peptaij. Bar juon ej ba tōmak im pokake. Bar juon ej ba lōke im kōjparok kien ko joñoul. Bar juon ej ba ito-itak im kwaļok Naan. Bar juon ej ba ukeļok, peptaij, tōmak, ṃōttan joñoul, kōjparok kien ko joñoul, im etal ñan jet tempel ko rej kwōjarjar im kōṃṃani jet bujen ko retino.

Āindein ke an Jisōs katakin kōj? ṃool ke bwe Jisōs ear ba, “Āinwōt juon wāween aṃ tōmak Eō, ijo wōt ke, kwōn tōmak Eō”? Jaab! Ewor juon wōt wāween tōmak Jisōs. Eļaññe e bōd kilen ad tōmak Jisōs innām je ban mour ilañ. Kiiō jenaaj katak kōn wāween an Jisōs bōk ruo kain armej: jet ajri im juon ri ṃweiiie.

1. Jisōs ear bōk ajri jidikdik ro.




Mark 10:13 Im rej āñintok ñan Ippān ajri redik, bwe En uññūr er; im rū kaļoran rej kauwe ro raar āñintok er.

Etke ro rū jelōk raar kauwe rūtto ro me raar āñintok ajri rein? Bōlen raar lōṃṃak bwe ajri rein renaaj kar kabañ jermal eo an Jisōs ak bwe raar jab aorōk kōn aer dik. Bōtab Jisōs ear oktak im kauwe er im ba,



Mark 10:14 A ke Jisōs ej loe, eļap An illu, im E ba ñan er, “Kōṃwin likūt ajri rañ bwe ren itok ñan Ippa; kōṃwin jab bōbrae er; bwe ro āierwōt, aer aelōñ in Anij.”



Etke Jisōs ear illu ippān rū jelōk ro? Eṃṃan ajri ro, bōtab

reddik. Re mōjño. Re jekapeel! Ekwe Jisōs make ej letok uwaak eo ilo jemlōken 14 eoon: *Bwe ro aer wōt, aer aelōñ in Anij.* E obrak aelōñ in Anij kōn ro re mōjño. Ro re bani aolep men.

Jisōs ej yokwe ajri. E kōṇaan bwe ren tōmak naan ko An.

- Kōj aolep, je lotak ilo jerōwiwi, im iumwin kajoor an Setan im mej.
- Wāween bwe jabdewōt armej, eo e dik ak eo e rūtto, en bōk lōmōṛ ej kōn an lōke Jisōs wōt bwe En an Ri Lōmōṛ.



Mark 10:15, 16 E mool Ij ba ñan kom, jabdewōt eo e jab bōk aelōñ in Anij im āinwōt ajri e dik, e jāmin deļoñ ilowaan.” Im Ej jiburlep er, im likūt Pein ioer, im jar kōn er.

Elaññe kwō kōṇaan deļoñ ilo aelōñ in Anij, kwō naaj aikuj in arin juon ajri. Emōj ke am lo tōmak an juon ajri jidikdik? Ejjeļok an pere ñan jidik. Ñe juon ej jibwe juon ajri edik ilo pein, ajri eo ej babu im kakkije. E jab mijak ñe ab rūtto eo enaaj kowōtļok e.

Juon niñniñ e jab kajjitōk ippān jemān im jinen kōn aikuj ko an, im e jab kajjitōk eļaññe men ko rej ba re mool ke jab. Ej baj tōmak er. Bōtab, ke e rūttoļok, e jino in make lōmṇak im kajjitōk eļaññe mool men ko ej roñ.

Anij e kōṇaan bwe jen lōke men ko Ej ba. Ilo wāween in, jej aikuj āinwōt ajri. Setan ear kōṇaan bwe Iv en jab lōke men eo Anij ear ba. Kōn ad lotak ilo jerōwiwi, je jepel jān Anij im jej loor ial ko ad make. Jej aikuj ukeļok jān ad loor kōj make im aikuj oktak im lōke Anij.

Jisōs ear ba bwe eļaññe kwō jab bōk aelōñ in Anij āinwōt juon ajri, kwō JĀMIN deļoñ. Ej meļeļein bwe kwōn kile bwe kwe ri ban. Ej meļeļein bwe kwōn bōk aelōñ an Anij kōn tōmak wōt.



Jon 1:12, 13 A ro raar bōk E, Ear leļok ñan er bwe ren erom nejin Anij, ñan ro rej lōke Etan, ro raar lotak, jab jān bōtōktōk, jab jān ankilaan kanniōk, jab jān ankilaan armej, a jān Anij.

Anij wōt e maroñ letok mour ekāāl im lōmōṛen kōj jān oṇean jerōwiwi ko ad.



Jon 3:16 Bwe kōn an Anij yokwe laļ, Ear letok juon wōt Nejin Ear keotak, bwe jabdewōt eo ej lōke E en jab jako, a en mour indeeo.

Ilo juon wāween ba, e pidodo gospel. Anij ear kōmṇane aolep jermal eo bwe en tōprak lōmōṛ. Jej aikuj wōt errā ippān Anij bwe jej ri nana im ri ban, im jej aikuj kōṇaan oktak jān ad nana innām tōmak bwe jermal an Jisōs wōt, kōn An kar mej ioon debwāāl, ej juļok jerōwiwi ko an armej.

Ñe jej lōmṇak bwe ewor men ko je maroñ kōmṇani bwe jen emṇan imaan mejān Anij, e utiej būruōd. Ej aikuj ettā būruōd āinwōt juon ajri, im jen lōke wōt.

Kab, jej lo ijin bwe ajri rein raar jab peptaij. Jisōs ear baj likūt Pein ioer im jar kōn er.


2. Juon ri mweie ej kajjitōk ippān Jisōs kōn lōmōṛ.



Mark 10:17 Im ke Ej ilok ñan ial, juon ej törtok im bukwelölö ñan E im kajjitök Ippän, “Ri Kaki emman, ta eo in kōmman bwe en aō jolöt mour indeeo?”

Rū kałor ro raar jab böbrae ri mweie in jän an kepaakłok Jisös. Ijoke raar kako ajri ro.

Likao in ear lõmñak bwe e maroñ kabuñbūruon Anij im deļoñ ilo aelōñ eo An kōn an emman im an kōjparok kien ko an Anij. Ear ainwöt Kein, bwe Kein ear lõmñak bwe Anij enaaj bōk e kōn an bōkłok jet men remman ñan Anij. Bōtab Anij ear jab bōk e.



3. Jisös ear kwałok bwe e Anij!



Mark 10:18 Im Jisös e ba ñan e, “Etke kwōj ba Ña emman? Ejjelok en emman, a juon wöt, Anij.”

Likao in ear jab kile bwe ejjelok armej im joñan an emman ear maroñ kabuñbūruon Anij.

- Ear jab kile bwe Anij wöt emman.
- Ear lõmñak bwe e emman im bwe Jisös ear bar juon armej emman ainwöt e.
- Meñe ear jab kile bwe Jisös ej Anij, ear ba bwe emman Jisös.
- Jisös ear jab meļeļin bwe E jab emman. Jisös ej Anij, im Ear kōñaan bwe likao in en kile bwe ejjelok armej emman.

4. Jisös ear jiroñ ri mweie eo bwe en kōjparok kien ko joñoul.



Mark 10:19, 20 “Kwō jeļā kien ko, Kwōn jab uror, Kwōn jab ļoñ, Kwōn jab kōt, Kwōn jab riab ñae, Kwōn jab man, Kwōn koutiej jemañ im jinōm.” Im e uwaak im ba ñan E, “Ri Kaki, men kein otemjej iar kōjparoki jän ien aō ajri.”

Ta mool ke jenaaj mour indeeo im jokwe ippän Anij ñe emman ad kōjparok kien ko joñoul? Aet. Bōtab wōn eo im e maroñ emman an kōjparok kien ko joñoul? Ejjelok. Ñe Bible ej ba “en emman am kōjparok kien ko joñoul” ej meļeļin bwe kwō jab maroñ in rupe jabdewöt iær ñan jidik. E lia eo e jab kōjparok aolepeir (Gal. 3:10).

Jisös ear jiroñ likao in bwe en kōjparok kien ko joñoul kōnke Jisös ear kōñaan bwe ļeo en jeļā joñan an nana.



Rom 3:20 Bwe ejjelok kanniök enaaj wānōk imaan Mejān kōn jermal ko an kien: bwe je jeļā jerowiwi kōn kien.

Innām kein ta kien? Ej kein añin ļok kōj ñan Kraist bwe jen wānōk kōn tōmak.



Galetia 3:24 Āindein kien juon ad ri lale in tōl kōj ñan Kraist, bwe jen wānōk kōn tōmak.

Jisös ear kajerbal kien ko joñoul bwe En añin ļok ri mweie in ñan e make bwe en lōke E. Bōtab likao

in ear jab mejele. Ear lõmņak bwe emņan an kōjparok kien ko joņoul.

Ejjeļok, ijellokun wōt Jisōs, ej kōjparok aolep kien ko an Anij. Likao in ear jab kile bwe ear ļotak juon ri jerowiwī. Ear lõmņak bwe, kōn an kōjparok jet iaan kien ko, emņan.

Anij ej lo būruōd. Eļāñņe jej dike juon armej, Anij ej ba jej uror. Eļāñņe juon likao ej mejkaie, Anij ej ba e ri ļōñ. Jej aolep likjab jān joņan an Anij wānōk.

Eļāñņe ewor juon jiae bwe armej ren aō jān Majuro ñan Bikini, ejjeļok armej e maroñ kōmņane. Bōlen jet rej kaminene mokta im jet re lukkuun kate er, ak e ban tōprak bwe ettoļok. Jet rej aō ettoļok jān bar jet, ak aolep re likjab. Āindein armej ilo aer likjab jān wānōk an Anij.

5. Jisōs ear jiroñ likao eo bwe en kōjparok mōttan juon kien.



Mark 10:21 Im Jisōs ej lale e im yokwe e, im E ba ñan e, “Juon men eo kwōj aikuj; kwōn ilok im wiakaki men ko otemjej aņ, im leļok ñan ro ri jeramōl, im enaaj wor mweiōm i lañ; im itok, im ļoor Eō.”

Meņe e utiej būruon likao in, Jisōs ear yokwe e. Anij ej yokwe kōj kajojjo meņe E jeļā bwe kōj ri jerowiwī. E jab kōņaan bwe jen jepel jān E ñan indeeo.

Jisōs ear ba ñan likao in bwe en wiakake men ko mweiien im leļok ñan ro ri jeramōl. Jisōs ear jeļā bwe leo ear aņokņak im yokwe men ko mweiien eļap jān an yokwe armej.

Jisōs ear kajjioñ in kwaļok ñan e bwe emōj an kōkkure kien Anij me ej ba bwe jen yokwe ri tūrōd im āinwōt kōj. Jisōs ear kōņaan bwe leo en kwaļok bwe e juon ri jerowiwī im aikuj juon Ri Lomņor.

Jisōs ear barāinwōt ba ñan leo bwe en ļoor E. Jisōs ear jeļā bwe leo ear yokwe men ko mweiien eļap jān an yokwe Anij, im kōn men in ear kōkkure kien eo kein ka juon.

Ejjeļok armej ear yokwe Anij kōn aolepen būruon ak yokwe aolep ro jet iturin joņan wōt e. Aolep re likjab im nana, im kōn men in rej aikuj jako. Anij e ban kōtļok ro ewor rueir. Bwe Anij en joļok ad bōd, ej aikuj wor kōļļā kōn aolep. Jisōs ear itok bwe En kōļļā kōn aolep.



Mark 10:22-24 A e kōmmeñ mejān kōn naan eo, im ej ilok im būromōj; bwe elōñ mweiien. [23] Im Jisōs ej rei bajjek im ba ñan ro rū kaļoran, “Ro ri mweiie re nañin ban deļoñ ilowaan aelōñ in Anij!” [24] Im rū kaļoran re bwilōñ kōn naan ko An. A Jisōs e bar uwaak im ba ñan er, “Ajri raņ, ro rej lōke mweiuk re nañin ban deļoñ ilowaan aelōñ in Anij!”

Likao in ear kōmņan kāālōt eo an. Ear kāālōt mweiuk ko mweiien. E maroñ mōņōņō kaki men kein ilo mour in, ak enaaj jepel jān Anij ñan indeeo. Ear jab kōņaan pokake Jisōs im ļoor E.



Mark 10:25 “E pidodo an kamel deļoñ ilo mejān needle jān ri mweiie deļoñ ilowaan aelōñ in Anij!”

Juon kamel eban deļoñ ilowaan mejān juon needle jekdoņon ta eo ej kōmņane. Enaaj kate im mōk.

Im juon ri m̄weie eban deļoņ ilo aelōņ in Anij jekdoņ ta eo ej kōmmane. Kiiō ro rū jelōk re kajjitōk ippān Jisōs juon kajjitōk e pen.



Mark 10:26 Im re kanooj bwilōņ im ba ñan doon, “Innām wōn e maroņ bwe en mour?”

Ilo ļōmņak an ri Ju, unin bwe juon ri m̄weie ear m̄weie ej kōnke eļap an kar Anij kajeraamman e. Kōn men in, ejjelōk kajjitōk bwe enaaj mour ilaņ, bwe emōj an Anij kajeraamman e. Ke rej roņ bwe e kadik pen an juon ri m̄weie deļoņ ilo aelōņ in Anij (ilo mool eban), rej kajjitōk im ba, “Innām wōn?”



Mark 10:27 Jisōs ej reiļok ñan er im ba, “Armej re bane, a e jab āinwōt ippān Anij; bwe Anij ej maroņ kōn men otemjej.”

Aolep armej rej bane wānōk. Anij wōt e maroņ ļoņoņren kōj. Ri m̄weie eo ear ļōmņak bwe e naņin tōpar mour indeeo kōn an kōjparok kien Anij. Ear ļōmņak bwe jidik wōt an likjab. Ajri ro raar reiļok wōt ñan Jisōs im lōke wōt E. Ear ettā būrueir. Raar itok ilo aer ban. Eļāņņe kwō jab bōk aelōņ in Anij im āinwōt ajri edik, kwō jāmin deļoņ ilowaan.

Ro ri jeraņol im ro ri m̄weie rej joņan wōt juon iņaan Anij. Je pojak ke in kile ad nana im oktak im ļoor Jisōs?

Kajjitōk ko:

1. Āinwōt juon wāween ad tōmak, ejimwe ke?
2. Rū jelōk ro raar kōņaan jilkinļok wōn ro?
3. Etke Jisōs ear jab jilkinļok er?
4. Ta eo enaaj waļok eļāņņe je jab itok ñan Jisōs āinwōt juon ajri?
5. Ta meļeļein, itok ñan Anij āinwōt juon ajri?
6. Ewor ke armej im enaaj wānōk iņaan Anij kōn an kōjparok kien?
7. Innām etke Jisōs ear jiroņ ri m̄weie eo bwe en kōjparok kien?
8. Ewi kien eo im ri m̄weie ear bane?
9. Aolep armej re bane ta?
10. Innām wōn eo e maroņ kawānōk kōj?